

庸閒齋筆記

陳其元著

第四冊

進步書局校印

庸問齋筆記卷十

海昌陳其元子莊著

張玉良

張璧田軍門玉良四川人。由行伍從向忠武公自廣西轉戰至金陵。積官至廣西提督。賞穿黃馬褂。短小精悍。驍勇善戰。威名甚著。咸豐庚申。杭城被圍。軍門奉檄來援。至則杭城已失。軍門以三十騎乘城而上。既登。則周麾而呼曰。大軍至矣。賊狼狽奔逃。不費一矢。杭城遂復。于是聲望大振。浙省倚之。有若長城。未幾金陵大營告急。檄之回救。杭人留之。幾於攀轅卧轍。時余從署布政使麟壯介公到省。目覩將軍瑞公學政張公挽留之切。竟至跪求。而軍門以令嚴不敢少止。遂率師去。乃到中途。大營已破。常州蘇州均不能守。仍返於杭。所存親軍僅數百人。巡撫王壯愍公招集潰散。悉軍實以予之。俾進規嘉興。以固浙江門戶。乃連戰失利。軍械遺棄殆盡。而所將之卒。均是敗兵逃勇。銳氣盡墜。已不能軍。不得已復歸於杭。杭人已自輕之。兼所部不能敵。戰時有騷擾。抗人恨之。詈之。至斥之為通賊。巡撫亦不加以禮遇。任其飄搖。江省庚癸頻呼。無人過問。較之前日跪留之款密崇重。若天壤矣。未幾嚴州被陷。巡撫檄令往援。軍門率所部五千餘人至蘭溪。之大洋鎮。扼守。寇卒簡陣。力圖攻取。時余奉

檄佐松百川太守辦理軍米糧臺。因時與軍門相見談次。每以兵勇不能用命為恨。余曰。何不重賞罰以激厲之。軍門曰。此等屢敗之卒。一言及賊。即心膽墮地。非獎勸所能振作。因頓足痛恨。何制軍棄常州不肯守。不然。同死于彼。豈不光明磊落云云。又言抗人謂我通賊。我以一走卒蒙拔擢。官至一品。花翎黃馬褂。皆邀異數。就令降賊。安能如此。此時亦不必辨正。當一死報國。明吾心耳。然其勇大率驕悍。擄掠不可制。營官亦無如之何。商民怨之切齒。嗣後援金華。復敗走。攻嚴州。克而守之。旋又為賊破。威名沮喪益甚。久之。杭州被圍。奉檄回救。駐師江干。餉援俱絕。人無固心。軍門志氣益厲。每日出隊擊賊。出必珊瑚冠黃馬褂。以自表異。時余避居富陽。曾棹小舟往見之。以高教曹旗蓋為戒。軍門慨然曰。力竭勢窮。抗城必失。我軍必潰。與其草間求活。孰若先死於行陣之得所哉。會報賊出隊。即麾衆持矛而去。余知其志在必死。太息而歸。越數日。果為賊破。攢擊折其左股。昇至營。以軍事屬總兵。況文榜而瞑。況統其軍。逾月。城破軍潰。況間行至上海。投李爵相軍。爵相用之。擊賊有功。竟以功名終。聞軍門歿後三四日。中夜士卒忽聞號令出隊殺賊。一軍驚起。開營欲出。忽悟其死。皆大驚痛哭。其義憤之氣。雖死猶生。謚曰忠壯宜哉。同時將帥援浙有名者。曰江長貴。李定太。周天受。皆不能成功。異時江李著績他省。周則戰死甯國。

不知姓名之忠義士

自咸豐軍興以來忠義之士奮身殉難不可勝計其被表揚廕子孫者固不少然湮沒無聞并姓氏不傳者尤不少也王鼎丞刺史定安嘗言從曾文正公攻安慶時江邊有一賊壘諸軍環攻之一營官戰甚力所部死傷甚衆鼎丞念其勤當諸軍暫退蓐食時親詣其營視之此營官方歸就食金瘡遍體部卒已亡其半忿怒大言不破此壘誓不生還云云比暮壘拔又往視之則其人已陣亡殘卒亦幾盡矣至今言之猶為慨然然此君姓名鼎丞不能記憶也咸豐辛酉四月十九日粵賊自湯溪撲金華時太守王君桐有楚勇五百駐於城上城大勇少不敷守陴乃令出守大橋余登城觀賊見一勇方據地蓐食一勇荷戈至謂之曰賊勢甚盛我與若走乎其人大怒目光如炬擲其碗起曰吃伊口糧此時可言走乎若與我往殺賊耳即持一鎗疾馳而去余竊歎曰若兵勇盡如此賊不足平也乃此五百勇守橋力拒自卯至巳賊竟不能過而張軍門玉良率援軍由蘭溪至矣方欣慰間軍門一戰而北賊遂長驅入城金華立時失守此人計必死矣然其姓名並不能知也此為余所目擊者乃談者謂賊以六騎至而金華即失此五百人三時力戰之勤一人奮身之勇均抹煞不傳哀哉

金烈女

江蘇清河縣北四十里有鎮名徐家溜。為海沐往來通衢。附近莠民。每以年少婦女伴宿行人。名曰趕店。即北方在平腰站等處之惡習也。金烈女者。乳名扣子。農民金本玉之妹。雖農家。而孝賢秀粹。幽閒貞靜。有大家女軌範。幼時即許字明尚忠嗣子。鳳岐為妻。過門童養。明尚忠係咸豐年間大盜陳三虎漏網之餘黨也。同治十年。鳳岐年已十五歲。尚忠貧無賴。欲令烈女趕店。女不可。尚忠疑鳳岐主之。日夜凌虐。鳳岐不堪。遂亡命。不歸鄉里。則傳為尚忠活埋致死矣。女亦心疑。因歸甯。不復返。十二年六月。尚忠夫婦至女家。勢洶洶索女。飾言鳳岐已有信。且歸。歸後當即為成婚。女兄畏其橫。聽攜之去。乃抵家日。即促令趕店。始以甘言繼以惡語。終鞭笞。女拒之益堅。尚忠等無如之何。于是日夕磨難。冀其或有轉志。然女至是已無生意矣。往再至十一月。有過客見女。豔其色。啖以重金。尚忠喜。又逼女。女不肯。簪之擬之女。則以死自誓。尚忠怒。于是與其妻謀曰。彼之所以固拒者。以未失身也。若強污之。彼見節已毀。事或可成。乃女拒益力。則以油捻紙灼其手臂。繼及胸腹。灼至黃油滴漉。女絕無乞哀順從意。夫婦咸怒。決計殺之以滅口。遂褫剥衣。棍以繩三匝縛于木櫬。更益火灼其頭面。至是膏黃焦黑。血肉模糊。女終嚙齒不出一聲而死。尚忠益怒。復以刀斫其頭面數處。並割其二乳以洩忿。鄉里見者。皆為髮指。事聞到官。尚忠夫婦願被供。謂女有外遇。尚忠妻疑尚

忠亦有染。故尚忠憤而致死。而女兄懦不能白。官亦不察。遂據詞以獄上。廉訪應公閱其牘。疑之。密訪研鞫。乃得寔情。敬其貞烈。哀其慘毒。遂抵尚忠夫婦于死。而詳請中丞專摺具奏。請旌表。並在徐家溜地方建坊立祠。以快人心。而伸正氣。蓋向來請旌之件。多歸題本。此案為表揚奇烈。起見。故不拘常格也。嗟乎。金扣子以農家女。目未睹詩書。身未嫻姆教。且生長于盜賊之家。而能堅持大節。萬死不移。此真天地間氣所鍾。廉訪極力為之彰擢。豈徒為維持風化之盛已哉。

蔣孝子

富陽蔣孝子元順。余壻濟霖之曾祖也。四歲喪父。家貧。偕其兄樵采以養母。兄夭。母哭之聲終其身。得風痺疾。孝子負以卧。起食飲。七匙便旋廁。躬進奉之。勿稍懈。妻朱亦賢。食姑恆飽。已則糠覈而已。朱先姑歿。元順躬兼婦職。母不覺婦之亡也。母患頭眩。祈神籤。須野豬腦。鮮荷葉。時隆冬。二物不可得。則求之餘杭越嶺。冒風雪。顛踣幾殞。迄無有。傍皇呼天。繼之以泣。忽獵者携一物至。視之野豬首也。長跽告之。故獵者憐而以腦與之。歸途見溪中浮一葉。睇之。乃鮮荷。益大喜。持以進母。眩頓差。有稱其孝者。歎曰。吾不能愈吾母身之疾。天酷我天。酷我。奚孝云。晚年家漸裕。有三子七孫。以上壽終。咸豐五年。得旌表。並建孝子祠。十一年。粵

賊陷富陽所過焚殺獨于孝子祠燭香而去嗟乎孝庸行也而乃感鬼神格盜賊如此乎人子之于父母其可忽乎哉

富貴中之苦境

旁觀者富當局者迷古語也富貴利達之地當局者第驚於進取而不知已蹈危機紛華靡麗之場當局者第樂其宴安而不悟早墮惡趣在旁觀者即非明眼人亦能料其敗也獨有富貴紛華中之苦境則祇當局者自喻之旁觀者不能知之也昔金匱孫文靖公以閩浙總督來嘉興閱兵千夫擁護萬眾觀瞻聲勢赫奕一時先大夫謁于舟次公言三十年前以諸生攜一僕歸家扁舟泊此今雖風景如昔而意興轉覺不如昔時先大夫對以封疆任重此心不免憂勞耳公曰非也因指中間供奉新到之廷寄曰外人觀總督如何榮耀而不知總督心中之苦惱此一件事令我措置萬分為難矣然所為何事公卒未明言也同治己巳余令青浦有洋人為盜在澱山湖中拒捕殺礮船哨官都司一人礮勇七人百姓三人余往勘驗盜已遠颺屍骸狼籍無可如何姑令收殮再行緝兇歸時在輿中籌畫此案中心懊悶欲死然呵殿騶唱如故也中途遇二老嫗避于道傍指余嘖嘖相謂曰此不知前世如何修行乃能修到如此余聞之默念我方恨今生何以不修做此知縣而彼乃羨慕謂前世修來者

何見解之相左耶。忽憶徐文靖公事。不禁為之夫笑。則旁觀者審一言。猶為未的也。

澱山湖洋人劫案

澱山湖之案。其始有英屬國之流氓。

謂即中國所
謂光棍者

在上海糾合英國人二。買一蘆墟船。乘之雇

上海人二為服役。雇寶山人二為行舟。至黃渡地方。又雇一青浦人。將至澱山湖。舟行遲復

于田間雇一人助之行。至湖中。適遇一地保錢糧船。劫之。乃船中僅有錢二十餘十耳。地保

跳而免。適見橋畔有巡緝破船在地。保熟其人。乃呼救。哨官令起。捉追賊。顧勇數不足。有鄉

人三。踴躍從之。賊望見。追至。揚帆逃。破船追十餘里。至崑山縣之千墩鎮。日已落矣。不能及

爰發礮擊之。一擊不中。再發。幾及之。賊遂落帆。洋人三。立于船頭。以手相招。若將還物也者。

破船遂駛近。不為備。相距咫尺。洋人突發手槍。哨官傷。墜水死。左右二勇斃于舟中。餘勇方

持械欲闕。槍再發。又殪內一勇。伴死落水。冰而逸。于是洋人持刀過船。將已傷及未傷者盡

殺之。悉擄舟所有。推銅礮於水而去。次日逃勇歸報信。余即詣勘。破船已為水營收回。哨官

及勇屍亦俱收訖。惟同往之鄉民三屍在。親屬號哭慘戚。余亦掩涕不忍視。乃捐廉俾其成

殮。而懸賞五百金以捕賊。不越月。先捕得上海寶山之四人。又青浦之舟子一人。其田中雇

來人。則因見賊殺人。當即投水逃去。不可究詰矣。于是用上海人作眼線。擒獲洋人二。其一

逃往廣東。署上海道杜公文瀾。又懸賞三百金捕之。未幾亦躡獲于廣東之香港。余赴上海會審。情真事確。中國人俱盡招。而洋人狡賴不肯承。爰囑于英國之領事衙門。蓋外國人不受中國羈禁也。彼時只候香港之犯解到定案矣。而香港之領事。故濡滯之總督馬端敏公。咨催廣督文內有札飭該洋官字樣。香港領事乃謂中外不相統屬。安得用該字以輕我。遂將兇犯縱之去。于是上海領事亦將兇犯釋放。而做船之弁勇暨鄉民十一人之死。無從取償。哀哉。余迄今念之。猶覺憤填胸臆也。

鹽梟行劫

咸豐辛酉。粵賊擾浙之際。有蕭山某州牧。自四川引疾歸。以道路不通。取徑上海。雇岱山人劉某船數隻。浮海至甯。劉固公之販私鹽者也。行至橫水洋。託言風色不順。泊舟品嶼中數日。乘夜啟某之箱籠。取其金珠寶玉。盡易以石。某君不覺也。比至甯舍館定。啟箱籠。則十年官橐盡羽化矣。遣人至岱訪問。其鄰里皆知之。直言不諱。某與甯道張觀察素識也。亟往訴之。觀察嚴檄拘提。抗不能得。乃遣弁勇捕獲之。而劉顧狡甚。堅不肯認。方研鞫間。而賊已暮至甯郡失守。劉遂脫歸。于是起華屋。置良田。弟若子姪。均娶美婦。添海船為販私計。公人嘖嘖稱羨。蓋所擄獲不下數萬金也。壬戌之秋。劉及弟若子姪。各司鹽船六艘。至蘇松海口售。

鹽易米滿載而歸。歸至橫水洋。陡遇颶風。六舟盡沒。無一生者。家中諸婦聞之。瓜分所有。均別抱琵琶去。頃刻之間。灰飛烟滅。此康齋弟寓岱時所目擊。岱人于是咸嘖嘖以爲有天道焉。第不知蕭山君子富郡陷後何如也。

雪災

道光二十年冬十一月。江浙大雪。平地積四五尺。山坳處則丈許矣。湖港俱凍。至明年正月。乃解。湖州安吉山中有寺。僧徒四人。其一人于雪甫作時。下山抄化。爲雪阻于山下村中。比雪消路通。則寺內之僧皆餓死矣。太湖中有一舟凍於中泓者。匝月凍解。船逐流下。舟內之人已盡斃。而甕中米尚存其半。則以火種絕不能炊而致死也。是年江浙二省均報雪災。最奇者。陳春壚明府祀宰奉天之錦縣。有娶親人途遇大雪。因相率入小路中古廟避之。雪甚封山。迷不得出。到一月後。男女兩家遣人四處覓之。則新婦及送迎之男女七十餘人皆餓斃廟中。春壚往相驗。爲之慘然。至咸豐十一年十二月。粵賊陷杭州。四出擄掠。天忽大雪。深至六七尺。賊不能行。難民乃得乘間逃逸。此又雪之救人而爲瑞者也。

朱封翁

寶應朱武曹先生彬。余師文定公之尊人也。沈潛理學。工詩古文。于經史尤極研究。舉孝廉。

官學博時文定公已通顯矣。督學使者非年家子。即小門生。先生于按試時。趨官侍立。唯謹。學使固辭。先生終不去。學使躊躇。深以為苦。雖老。每會試。必與計偕。文定公官至列卿。同人咸勸先生可勿應試。先生不肯。道光癸未。公放會試總裁。示貼迴避親父某。人都中傳以為笑。儒林中嘖嘖歎美。而先生懷喪特甚。擬留京俟再試。于是棘槐諸大臣咸勸公為奏請一品封典。俾致仕。先生初不知也。比命下。則大怒。以為阻其上進之路。選大杖欲撻公。公介戚友跪謝乃已。乙酉。公視學浙江。先生偕來。公持法嚴。士子有過及文藝小疵。咸夏楚。不少貸。其作奸犯科者。無論矣。故時比之雷部神。有天君之稱焉。賴先生時為訓解。公因之少霽威嚴。然承杜石樵尚書後。以猛濟寬。人多不堪。歲試未竣。飛謗已至京師。吾鄉錢心吾給諫特疏劾之。事下廷議。謂學政奉公行法。職也。惟親父不應隨棚按臨各郡。予公薄譴。先生遂浩然歸去。歸後以載籍自娛。不問外事。年逾大耋乃終。先生瀕行時。猶諄諄以寬為勸。余于次年科試入學。文中記一字。比發落時。心惴惴恐被責。竟得邀免。則先生之餘蔭也。士辰應京兆試。至都謁文定公于邸第。訓迪肅然。如坐春風中。與督學時氣象迥殊矣。時先生年八十。新撰禮記訓纂成。得寓目焉。越四十年。服官於蘇。得晤先生曾孫縵伯太守。以遊道堂文集見示。緒讀數過。始知先生學問之醇。行誼之厚。寔從敏求好古中得之。以淑其身。以啟其子。

孫有以哉。有以哉。

方敏恪公軼事

先大父嘗言高祖粵南公。雍正丁未會試。與仁和沈椒園先生共坐一車。每日恆見一少年。步隨車後。異而問之。自言桐城方氏子。將省親塞外。之資。故徒步耳。二公憐其孝。援令登車。而車狹不能容。于是共議。每人日輪替行三十里。俾得省六十里之勞。到京別去。不復相聞。問矣。後二十餘年。粵南公以雲南守赴都。椒園先生時陳臬山左。亦入覲途中。忽有直隸總督差官來迎。固邀至節署。相見。則總督即方氏子。歡然握手。張筵樂飲十日。稱為車笠之交。一時傳為美談。茲見武曹先生所記方敏恪公軼事。有相類者。用附錄之。曰。吾鄉喬堅。本文嘗歸自京師。返道過保定。時直隸總督為方敏恪公。喬方出也。公留署累日。一夕酒半。喬自陳屢赴公車。佗條不得志。公曰。甥得母有飢不食耶。喬作而對曰。未也。得母有寒無衣耶。喬作而對曰。未也。公笑曰。嘻。是奚足怖。吾方窮時。將遊京師。至寶應資鑿。歲將暮。寒風栗烈。敝縕袍僅行線存。中無裏衣。束帶長尺餘。兩端以貫續之。納履則足之前後皆見。將詣汝母。丐數金。北上。甫抵門。僕者衣冠甚都。列坐於門之兩楹。余遂巡欲入。僕詰曰。客奚為者。余曰。將探吾戚。僕笑曰。是安得有若戚。得母為行竊計耶。余自顧。寡人子。欲言之。恐礙汝母。遲回久之。終

弗入。迺信步折而東。又屈曲西行里許。至盧家巷。巷門為南北通衢。有屠門。市者如爭屠。每割。必情對字列肆者書數。往來甚煩。列肆者每厭苦之。余倚柱而笑。屠顧見曰。客何為者。作字比不得。切肉也。余拱手曰。非敢然也。見長者行甚苦。小子略識字。幸不棄。可代勞耳。屠喜曰。客乃能書。即借肆中紙筆。置几旁。屠者手切肉。權輕重。即口誦數。余奮筆疾書。食頃已更數十紙。屠笑曰。客之書更速于我之切也。會日暮。屠者荷餘肉行。顧余曰。吾知客未飯。盍從我于家。余隨之。數百步。門臨河畔。茅屋三間。一女應門。可十八九許。屠呼老嫗出曰。吾幸延客。速作飯。叩其姓。胡也。亦近問余數曰。是縉紳官家子也。坐余以堂。少選。提一壺酒。命女溫之。燭至。命嫗女俱坐。曰。客幸不見外。我老嫗子。迫歲甚忙。又無夥伴。客能留乎。歲當必有以將意。余曰。景窮途。長者見收。幸甚。屠大喜。酒至。輒取盃中鹽菜為副。切肉置大槃。是時余已餓竟日。酣飲快意。視今日之節制。饕餮其樂十倍。飯罷。度門扇為牀。布草蓆。取布被覆焉。天將明。呼余起。日記數以為常。除夕為置酒肴羹肉。共食如初。元日。余攬衣起。則非復故衣。一藍布袍。新布絮襖。近身裏衣絮袴。內外補綴完整。布襪履各一。余驚起拜謝。屠笑曰。客此去當作官人。區區者奚足言。開歲五日。余欲去。屠曰。此間雜事甚閤。幸更延十數日。余心德之。不能却也。望後乃辭以行。屠者曰。固知客不能留也。又置酒肴為餞。翌日。贈錢四千。襪被囊。

一。將所覆被并錢納馬。送至河干。余拜屠亦拜。附船至山東囊中餘錢數百有故交自北來身無一錢分半與之。遭遇聖恩。以有今日。皆屠長者賜也。及為直隸布政司時。遣一介以千金報德。且戒曰。若肯來。即備輿馬迎至署中。至則門巷蕭條。屠夫婦身歿已久。女適誰氏子。亦不知所終。言至此。公泣數行下。座客為之改容。喬恍然如有所失焉。

少見多怪

家梅亭方伯。任四川打箭鑪同知時。彼處人偶見蟹。稱為瘟神。打鼓鳴鑼而送之郊外。方伯取而食之。人皆大驚。謂官能食瘟神。四境聳服。沈括夢溪筆談云。陝西人家收得一乾蟹。怖其形狀。以為怪物。而病瘧者借去。掛門上。往往遂差。黎士宏仁恕堂筆記。謂甘肅人不識蟹。疑為水底大蜘蛛。俄羅斯國人不知鰻鱓。訛為水蛇。中國人何以食之。蓋物之未經寓目者。初睹之。未嘗不以為奇。如山東張小海太守食鮮蚶。連壳嚼之。幾損其齒。與蔡謨誤食螃蟹。吐下委頓。皆可一笑也。

遊泰西花園記

上海自泰西通商後。環北門外十餘里。奏明給洋人居之。洋人歲輸其租。謂之租界。租界為英法美三國分踞。一切公事。歸華洋同知。暨三國領事會同辦理。除命盜案外。地方官不復

與聞焉。夷夏雜雜。人衆猥多。富商大賈及五方遊手之人。羣聚州處。娼寮妓館。趁風駢集。列屋而居。倚洋人為護符。吏不敢呵。官不得詰。日盛一日。幾于花天酒地矣。余攝縣事時。欲稍稍裁抑之。而勢有不能。嘗飭洋租地保密稽之。蓋有名數者。計千五百餘家。而花烟館及鹹水妹淡水妹等等。尚不與焉。女閭之盛。已甲於天下。乃自同治紀元。後外國妓女。亦泛海而來。搔頭弄姿。目挑心招。以分華娼纏頭之利。于是中外一家。遠近裙屐治遊之士。均以夷場為選勝之地。彼洋人之漁中國財者。亦可謂無所不至焉耳。休甯余古香觀察本過來滬。總辦浙江海運局。有遊泰西花園記一篇。敘述詳盡。筆致栩栩。于板橋雜記秦淮畫舫錄外。又開一格。因備錄之。以見溱洧之風。海外亦復沿波。深可太息也。

乙亥孟春。匝月無旬日晴。偶值天霽。又須從事江干。以故春到人間。猶未覺也。隆愷臣司馬由皖中來申。假館于局。局在邑南城外。殊嫌湫隘。愷臣每思北遊。以海上精華。咸萃于北。遠方來者。莫不耳逐神馳也。念八曉晴。以事當至虹口。予偕卿雲皖生並拉愷臣恭閣。同肩輿至老間。冀得翼甫與俱。作嚮導耳。翼甫當設饌饌客。饌後各舍肩輿。乘馬車。縱轡以行。約十餘里。至虹口屯糧處。時監兄為陶叔南大令。陳韻和少尹。二君同寓洋樓。樓三楹。濱江而築。輪舶漕艘喧闐。在浦無足留連。因再登車。隨翼甫報駒西適。自是則一望平原。園林樹比。長

橋跨水。傑閣凌雲。遠瞰春申江。白舫烏篷。亂如飛鳥。陌上車塵馬跡。華夷雜沓。電掣星馳。愷
臣目所未經。不禁拍掌叫絕。忽于碧樹彎環處。車為之停。下視同人。皆踏莎而立。一時香車
寶馬。錦簇花團。華妓洋娼之外。別有所謂鹹水妹。淡水妹者。黎閩皆一一指名。予與愷臣。推
略認其梳妝服飾。而巳。路旁有方井一。又有靜安古寺。以紆道不果游。翼甫速客登車。謂須
及早一遊。徐家衛外國花園。遲則游人星散。便無可觀。再行數里。到一籬落。車數輛。憩老槐
樹下。荆扉斜敞。碎石成蹊。翼甫入。同人皆入。翼甫曰。左左之。曰右右之。曲折升階。迴廊抱室。
有番婦紫齒迎門。儼然酒家胡招客飲者。一傭人導客別舍。冰盃晶盞。几席橫陳。予量不勝
蕉。眾以酒美勸。姑冷飲半甌。已微醺。出巡簷走。聞笑聲達戶外。則兩番妹。簪艷卉。拖長裾。自
旁舍出。嫵娜作態。望之如畫圖中人。惟鬢髮黃。秋波碧。暈與中國粉白黛綠不同。時同人
各穿細徑。拾翠尋芳。予適闖入一院。于疎篁密棘中。插鞦韆一架。上貫雙絙。挽棠木小舟。中
坐一少年客。洋人推蕩之。以為戲。同人聞聲咸集。兩番妹亦珊珊來。相與狂笑。以妙手空空
兒之倭高而倭下者。非他人。即翼甫也。洋人指一番妹。笑令飛登。與翼甫相向坐。于是推者
推。蕩者蕩。雙飛雙落。髻鬟巾欵。直視中外為一家矣。喧笑未已。又有兩青衣妹。結駟來游。四
美相見。喃喃似皆勾欄姊妹。花舊相識也。豈采蘭贈藥之遺。泰西風猶近古與。夕陽既墜。與

人促歸。爰循老閭肩輿踏燈而返。是日同游者。為隆君愷臣山。潘君藜閣青照。王君卿雲維煜。貝君皖生澂。朱君翼甫其詔。并有姚君善民。張君亦槎。暨予共八人。

浙亂後樂府

浙江自庚申辛酉。遭賊竄陷。經左爵相轉戰數年。至甲子歲始行戡定。百姓辛苦流離。為賊匪所殺。為飢寒所殺。為疾疫所殺者。不知凡幾。哀我人斯。將無孑遺矣。幸爵相心乎愛民。于入浙創立軍府時。即首為賑濟。加意撫綏。出水火而登衽席。殘民始有更生之慶。將鄉泉中丞佐之。興利除弊。各事極意講求。馬端敏公繼之。勞來安集。以養以教。民乃得醵其居。今日我浙之得以熙熙攘攘。漸臻富庶者。三公之力也。然當賊氛甫息之時。凋敝之情形。流亡之困厄。鐵人見之。亦不免下淚。古香觀察有聞見篇四章。古音古節。真不減杜老之哀江頭諸作。因備錄之。俾吾浙人無忘在莒時也。豬換婦。朝作牧豬奴。暮作牧豬奴。冀得牧豬婦。販猪過桐廬。睦州婦人賤于肉。一婦價廉一斗粟。牧猪奴牽猪入市廛。一猪賣錢十數千。將猪賣錢錢買婦。中婦少婦載滿船。蓬頭垢面清淚連。我聞此語生長吁。就中亦有千金軀。嗟哉婦人猪不如。屋劈柴。屋劈柴。一斧一酸辛。昔為棟與梁。今成樵與薪。市兒詆價苦不就。行行繞遍江之濱。江風射人天作雪。飢腹雷鳴皮肉裂。江頭邏卒敗老人。奪柴炙火趨城闕。老人結